

आकाशवाणी जैपुर-अजमेर ऊं

खास समाचार

- केन्द्रीय जनजाति मामलां रा राज्य मंत्री सुदर्शन भगत प्रदेश रा न्यारा-न्यारा जिलां मांय जनजाति मंत्रालय कानी ऊं चलाया जा रह्या कार्यक्रमं रो आज उदयपुर मांय जायजो लीनो ।
- उच्च शिक्षा मंत्री किरण माहेश्वरी कह्यो – लारला पांच साल ऊं चाल रह्या स्ववित्त पोषित कॉलेजां नै अबै राज्य वित्त पोषण रा तैत लाया जावेला ।
- दिव्यांग फौजियां री बहादुरी री कहानियां फौज सामी लावेला- सालभर कार्यक्रम व्हेला । अर
- महिला अर बाल विकास मंत्री अनीता भदेल कह्यो – महिलावां री हिफाजत सरकार री ई नहीं बल्कि सगळां री जिम्मेदारी ।

केन्द्रीय जनजाति मामलात मंत्री सुदर्शन भगत प्रदेश रा न्यारा-न्यारा जिला मांय केन्द्रीय जनजाति मामलात महकमा कानी ऊं चलाया जा रह्या कार्यक्रमं रो जायजो लेवण सारू आज उदयपुर मांय अहलकारां री मीटिंग लीनी । वै जनजाति हलकां मांय बिजली अर पाणी री व्यवस्था तै करण सागे ई जनजाति मंत्रालय कानी ऊं चलाई जा रही योजनावां रो फायदो जरूरतमंद लोगां ताई पूगावण रा हुकम दीना ।

0000

उच्च शिक्षा मंत्री किरण माहेश्वरी आज विधानसभा मांय बतायो कै प्रदेश मांय लारला पांच साल ऊं स्व वित्त पोषित योजना मांय चाल रह्या कॉलेजां नै राज्य वित्त पोषण रा तैत चलाया जावेला । श्रीमती माहेश्वरी प्रश्न काल मांय विधायकां रा सवालां रो जवाब दे रही ही ।

0000

सहकारिता मंत्री अजय सिंह किलक बतायो कै मौजूदा सरकार हाल ताई छह हजार 504 करोड रूप्या ऊं बत्ता मोल री जिंसां री खरीदी सरकारी मोल अर पीएसएफ योजना रा तैत कीनी है ।

0000

सहकारिता मंत्री अजय सिंह किलक आज विधानसभा मांय बतायो कै प्रदेश मांय केन्द्रीय सहकारी बैंकां ऊं जुड़्या करसां नै औसतन 58 हजार रूप्या रा कम मियाद रा बिना ब्याज रा कर्जा साखां सारू दिया ज्या है । श्री किलक प्रश्नकाल मांय विधायकां कानी ऊं पूछ्या ज्या पूरक सवालां रो जवाब देता थकां बतायो कै ओ एक कीर्तिमान है ।

0000

सामाजिक न्याय अर अधिकारिता मंत्री अरुण चतुर्वेदी विधानसभा मांय बतायो कै प्रदेश मांय हर भांत रा पेंशन लेवण वाळां नै पेंशन रो लगातार ऑनलाइन चुकारो कर्यो जा रह्यो है । वै बतायो कै एकल नारी पेंशन मांय बघोत्तरी करीजी है अर 60 ऊं 75 साल ताई री महिलावां नै मिलण वाळी पेंशन री रकम 500 ऊं बधा र 1000 रूप्या अर 75 साल ऊं बत्ती उमर री महिलावां सारू पेंशन साढे सात सौ ऊं बधा र डोढ हजार रूप्या कर दीरीजी ही जिण रो चुकारो जुलाई 2017 ऊं ऑनलाइन कर्यो जा रह्यो है ।

0000

राज्य सरकार करसां रा 31 जनवरी ताई रा बाकी सिंचाई कर नै आवती 31 दिसम्बर ताई एक मुश्त जमा करावण परां पूरो ब्याज माफ करण रो ऐलाण कीनो है । ई बारा मांय सरकार खास हुकम जारी कीनो है ।

0000

केन्द्रीय सूचना अर प्रसारण राज्य मंत्री कर्नल राज्यवर्द्धन सिंह राठौड़ काल अलवर जिला रा बानसूर पधारेला । वै जयपुर ग्रामीण लोकसभा हलका रा बानसूर, कोटपूतली, चंदवाजी, आमेर अर जमवारामगढ मांय न्यारा-न्यारा कार्यक्रमं मांय सिरकत करेला । वां रो दीतवार नै जयपुर अर नागौर मांय व्हेवण वाळा जळसां मांय सिरकत करण रो कार्यक्रम है ।

0000

प्रधानमंत्री नरेन्द्र मोदी 25 फरवरी नै आकाशवाणी ऊं प्रसारित व्हेवण वाळा मन की बात कार्यक्रम मांय वां रा विचार बतावैला। ओ कार्यक्रम राज्य मांय आकाशवाणी रा सगळा केन्द्रां ऊं संवारे 11 बज्यां ऊं कर्यो जावेला।

फौज ओ साल वां बहादुर फौजियां नै समर्पित कीनो है जो देश री सेवा करता थकां दिव्यांग व्हेग्या। फौज साल भर ऐड़ा बहादुर फौजियां री कहानियां जनता ताई पूगावेला अर आ रां मान सारू केई काम करैला। दक्षिण पश्चिम कमान रा जनरल ऑफिसर कमांडिंग-इन-चीफ लेफ्टिनेंट जनरल चेरिश मेथसन खबरनवीसां नै बतायो कै दूजा विश्व युद्ध पाछे हाल ताई व्ही लड़ाईयां मांय जख्मी फौजियां ऊं फौज सम्पर्क करेला अर वां ने ऊपतू अंग अर जरूरी उपकरण मुहैया कराया जावेला।

0000

महिला अर बाल विकास मंत्री अनिता भदेल राज्य मांय महिलावां नै मजबूत बणावण माथे ज़ोर दीनो है। आज आकाशवाणी रै मार्फत जणता सागे सीधी बातचीत करता थकां श्रीमती भदेल कह्यो कै महिलावां री हिफाजत केवल सरकार री जिम्मेदारी नी है बल्कि आ हर रहवासी री जिम्मेदारी है। वै कह्यो कै गर महिलावां हिफाजत सागे रैहवैला तो राज्य हर हलका मांय निश्चित तौर ऊं तरक्की करैला।

0000

चिकित्सा अर स्वास्थ्य मंत्री कालीचरण सराफ आज जयपुर रा सवाई मानसिंह अस्पताल रो दौरो कीनो अर महेशनगर अर ब्यावर मांय गैस सिलेण्डर फाट जावण ऊं व्ह्या हादसां मांय जख्मी लोगां रो हालचाल पूछ्यो। अस्पताल रा बर्न वार्ड मांय ब्यावर हादसा रा चार अर महेश नगर हादसा रा दो जणा भर्ती है। श्री सराफ स्वाइन फ्लू री बीमारी रा इलाज रा काम रो जायजो ई लीनो अर अहलकारां नै जरूरी हुकम दीना।

0000

क्षेत्रीय प्रचार कार्यालय री अजमेर अर अलवर इकाइयां कानी ऊं स्वच्छ भारत अभियान अर स्वच्छ सर्वेक्षण 2018 सारू जयपुर रा सांगानेर हलका मांय राख्यो ज्यो खास कार्यक्रम आज पूरो व्ह्यो। समापन जळसा मांय जयपुर नगर निगम रा उप महापौर मनोज भारद्वाज केन्द्र सरकार कानी ऊं चलाया जा रह्या स्वच्छ भारत अभियान री जाणकारी दीनी।

0000

सीकर ज़िला रो नामी खाटू श्याम जी रा सालाना मेळा मांय मोकळा जातरू पूग रह्या है। पुलिस अर प्रशासन मेळा मांय हिफाजत रा पुख्ता इंतजामात कीना है। म्हाणा खबरनवीस बतायो कै अठै सी सी टीवी कैमरा अर ड्रोन कैमरा ऊं निगरानी राख्यी ज्या रही है।

0000

जयपुर जिला रा सांभर मांय आज तीन दिन रो सांभर महोत्सव सरू व्ह्यो। पर्यटन अर कला संस्कृति नै बधावो देवण रा मकसद ऊं व्हे रह्या ई महोत्सव मांय जूनी कारां री रैली, ऊंट सवारी, पैरा ग्लाइडिंग, कार अर मोटरसाइकिल रैली, हॉट एयर बैलून अर पतंग उत्सव समेत केई आयोजन व्हे रह्या है। ई मौके स्थानीय खेल ई राख्या जा रह्या है।

0000

क्षेत्रीय प्रचार निदेशाल अर आवास अर शहरी कार्य मंत्रालय कानी ऊं स्वच्छ भारत अभियान अर स्वच्छ सर्वेक्षण 2018 रा बारा मांय एक खास जनचेतना कार्यक्रम एल बी एस अकादमी कोटा मांय राख्यो ज्यो। जलसा रा खास पावणा कोटा विश्वविद्यालय रा कुलपति प्रो. पी के दशोरा कह्यो कै स्वच्छता रो अभियान हर जणा रा ई संकल्प सागे ई पूरो व्हेला कै वो इण मांय भागीदारी करेला।